

Коми Республикаса том войтырлөн газет



Катшасина газет  
5 л.б.

**Тайо  
НОМЕРЫН**

Том гижысьяслön Гожся университет тыр-бура уджалис гуркарын июль 1-7 лунъясö. Кыдзи и пыр, томулов велöдчисны журналистика да художествоа гижöд лабораториясын. Ныв-зонлы подув тöдöмлун сетисны нималана гижысьяс да журналистикяс. Ми окотапырысь йöзöдам том гижысьяслысь университетын велöдчöм йылысь сьölöм-кылöмъяссö.

6-11  
л.б.

Гашкö, воис жö сэсса гожöмыд, а сыкöд тшöтш отпускалан кад. Мöдöдчан саридз дорö, а кадыс дзик нин абу сумка чукöртöм вылö? Вöзъям медшöрсö, мый ковмас тэныд пляж вылын.

14  
л.б.

Коми Республикаын Россия МЧС-лön медшöр управлениеысь уджалысьяс вöзйöны челядылы индöдъяс, кыдзи колана ногөн колявны гожöм. Мед эськö некутшöм неминуча оз су ныв-зонмöс ни гортын, ни бывааын.

15  
л.б.

Этикет правилö ёна мичмöдö мортöс, и, мöдарö - няйтö уськöдö, он кö сийöс тöд. Озыр коть гöль, колö кужны кутны асьтö йöзаиннын. Вайöдам некымын индöд, мый медьёна паськалöма миян повстын.

16  
л.б.



**«Иноватика-Крохаль 2014»**

Июль 8 лунö Ухта бердын воссис «Иноватика-Крохаль 2014» томуловлön форум.

Ставнысö чолöмалис Коми Госсöветын председатель Игорь Ковзель да сиис бура уджавны томуловлы.

- *Унджык вензьöй, öг буретш сэки чужöны колана мөвпяс. Сёрнитшöм - форумылöн медшöр мог, медым гортаныг локтöм бöрын верминныг юксыны ёртъясыдкöд колана юөрөн. Тян том каг да öзъялысь синъяс вылö видзöдигөн позьö сöмын вежавны, эн воштöй тайöс,* - висьталис Игорь Ковзель.

Форумыс мунö нельöд во, и öни сийö регионъяскостса тшупöдын нин. Ухта бердö воисны республика пасьта, а сідзжö Москвасысь, Санкт-Петербургысь, Северодвинскысь да Калининградысь томулов.

Форумыслön медшöр мог - эксперт да пырöдчысьяс костын сёрни, кужанлунön юксьöм. Та вылö вичмöдöма 5 лун да 5 юкөн: «Кадровый клуб», «Ты - предприниматель», «Технопарк», «Здоровьесберегающие технологии», «Цивилизация России», а сідзжö «Умник» да «Медиапоток». Форум вылö локтысьяслы дасьтöма палаткаа лагер, уна сикас рытпук, футболön, баскетболön, волейболön ворсан площадкаяс.

«БНКoми» серти



**Гажтöмтчыны лöö некор**

Воркутаын бара на лöö байк-фестиваль. Кольöм во гаж вылас волисны «Маша и Медведи», «Чёрный обелиск», «Чёрный кофе» да «EASY DIZZY» котыръяс.

«Полярные волки» байкеръяслön клубön веськöдлысь Алексей Поморцев серти, таво клубысьяс чужанлун паськыда пасйыны оз мойви сьöм понда, но нинöм вылö видзöдтöг гажыс лöö.

Июль 18 лунö рок-котыръяс байкеръяскöд öтув мунасны Воркуталön медшöр улица кузя. Июль 19 лунö котыртасны рок-концерт, а сідзжö ярманга, рыцаръяслысь тыш, быдсикас конкурс, полевой кухня да мотовыставка. Лунön сёрнджык, кольöм воö лöсьöдöм традиция серти, лöö «Парад невест», кытчö тшöтш пырöдчасны байкеръяс.

«Коминформ» серти



Тавося март төлысьын «Йөлөгә» газет редакция юөртліс Иван Алексеевич Куратовлөн чужомсяньыс 175 вося тшупода паслы сйом «Со кызд сійос төда ме...» конкурс йылысь. Буретш июльö - медводдза коми гижысьлөн чужан төлысьö - шум вöчны кывкөртөд.

## «Со кызд сійос төда ме...»

### конкурслы кывкөртөд

Медводз висьталам ыджыд аттё ставныслы, кодэ эз дышөдчы да пырөдчис тайö конкурсас. Збыльысь öд, абу кокни гижны ассыд сьөлөмкылөмгястө Иван Куратов да сылөн творчество йылысь. И зэв нимкодь, мый вель на и унаөн ыстисны ассыныс уджыассö конкурс вылө.

Кодлөнкö уджыс артмөма аслыспөлөсөн, кодлөнкö дзик нин мөд нога восьтөма конкурс нимсö, кодкө и кывбур гижөма, а кодкө и серпасалөма. Со, вөлөм, кутшөма позьö водзмөстчыны творческой конкурсад!

Став уджсö ми тэчим öти папкаö да шум козьявны юркарын меститчөм Иван Куратов нима музейö, медым сэтчö волысьяс вермисны нимкодьясьны-лыдысьны сьөлөмсяньыс гижөм уджыасөн.

Но конкурсд сы вылө и эм, медым бөрийыны вермысьос. Донъялісны став уджсö «Коми йөзөдчан керкаын» зільысьяс:

Павел Иванович Симпелев, Алексей Владимирович Полутрудов, Александр Васильевич Ульянов да, дерт, жö конкурс дасьтысь - Галина Валерьяновна Макарова.

И сідз, Иван Алексеевич Куратовлөн чужомсяньыс 175 вося тшупода паслы сйом «Со кызд сійос төда ме...» конкурсын **медводдза тшупода диплом** вичмис Изьва районса Кипиево сиктысь **Александра Истоминалы**, велөдысьыс - Нина Николаевна Ануфриева.

**Мөд тшупода дипломсö** донъялысьяс шуисны сетны Изьва районса Изьвавом сиктысь **Мария Абрамовскаялы**, велөдысьыс - Зоя Александровна Артеева.

**Коймөд тшупода диплом** босьтіс Көрткерөс районса Ыджыдвидз сиктысь **Полина Старцева**, велөдысьыс - Эльвира Александровна Старцева.

Жюри шуис торйөдны нөшта

«Поэзия» нимпасын водзмөстчысьос: тані **медводдза места** босьтіс Инта районса Петрунь сиктысь **Вадим Семяшкин**.

Нөшта аслыспөлөс уджыас - Иван Куратовлөн кывбургыас дорö серпасыас - воисны Көрткерөс районнысь Ыджыдвидзса школалөн «Шондібан» котырö ветлысьясянь, велөдысьыс тшөтш Эльвира Александровна Старцева. «Шондібан» котырса ныв-зонлы тшөтш вичмис торья дилом.

А став мукөд пырөдчысьлы вичмисны Иван Алексеевич Куратовлөн чужомсяньыс 175 вося тшупода паслы сйом «Со кызд сійос төда ме...» конкурсö пырөдчөмысь дипломгяс. Тайö:

- Ухта районса Кедвавомысь 32-öd номера школаын велөдчысьяс - Жанна Дуркина, Анастасия Семяшкина, Анастасия Изай да Кристина Семяшкина, велөдысьыс - Татьяна Валериевна Жукова;

- Ухта карса 16-öd номера школаын велөдчысь Анна Коростелева, велөдысьыс - Елена Александровна Быстрова;

- Инта районса Петрунь сиктысь Кристина Проворная;

- Изьва районса Изьвавом сиктысь Диана Филиппова, велөдысьыс - Зоя Александровна Артеева;

- Усинск районса Мутной Материк сиктысь Светлана Шахтарова, велөдысьыс - Надежда Николаевна Шахтарова.

Став сьөлөмсянь чолөмалам вермысьяссö! Кутшөм ті молодечьяс! Водзö тадзи жö водзмөстчөй, пырөдчөй конкурсгясö да нимөдöй коми кывнымöс.

Конкурс серти став юалөмөн позьö шыөдчыны «Йөлөгә» газет редакцияö 24-12-22 телефон либө yologa@mail.ru электронной пошта пыр.



GAЖ

Июль 4-6-öd луньясö Сыктывдін районса Вильгортин дас öтиöдысь нин гораа юргис йöзкостса сьыланкые петкöдчысьяслön став Россияса «Завалинка» гаж.

# Юргис-шыаліс «Завалинка»!

Тавося фестивальсö сиисны Сыктывдін районлön 85 вося тшу-пöда паслы. Гаж выlö воысь-во пыр унджыкөн воывлöны. Таво со ассыныс енбинысö волісны петкöдлыны Киров, Ярославль, Астрахань да Архангельск обласьгьясысь, Марий Элысь, Мордовияысь, Удмуртияысь, Чувашияысь да Коми Республикаса кар-районгьясысь сьылан-йöктан котыряс.

Медводз, июль 4-öd лунö, вöлі творческöй котыряс пöвстын конкурс. А мöд лунас нин ставöн петкöдчисны «Эх, гулянья сыктывдинские!» гала-концертн. Гран-при вичмис Мордовияса «Мерема» фольклорнöй ансамблы.


Рытнас нин гöсьтгьясöс гажö-дїсны да шензьöдїсны мича гөлöснаныс Санкт-Петербургысь воём «Колесо» фолк-шоу группашы сьылысьяс. На бöрын петкöдчис «Братгья Радченко» дуэт.

Лунтыр Вильгортса шöр улчын уджаліс «Мастергьяслön кар» ярманга. Мыйсö сöмын эз позь нöбны мукöд регионса мастергьяслысь! Лунтыр жö и позис пырöдчыны «Ворсыштам» творческöй площадкö, кöні велöдїсны ворсны важся коми ворсöмгьясö.

Рытгорув нин ставöн виччысисны диджей да ремиксер DG FAVORITE-лысь петкöдчöмсö. А медым эз гажтöм вöв виччысьöмыс, нималана шоуменгьяс - Иван да Константин Басковгьяс - гажö-дїсны сцена вылын конкурсьясöн. Удал зонгьяслы уси шуд вермыны да козин пыдди босьтны планшет, сöмын пö мед сійöс эсэсь козыналасны радейтана анылы. Серамбана конкурсгьяс нуöдöм бöрын вермис Сергей зон, кодї дзик пыр и окыштгїмоз козыналіс планшетсö радейтана Ольга нылыслы.

Медбöрын ставöн гажöдчисны йöктисны DG FAVORITE-лön ремиксьяс улын. А сигöртис гажсö мича фейерверк.

Миян корр.



Снимокгьясыс Галина МАКАРОВАЛÖН.





## Гаж бөрся ГАЖ

*Июль 8 лунö республикаса юркарын пасйисны Семья, радейтчөм да верность лун.*

# Семья да радейтчөм лунөн!

Гаж выlö чукөртчисны Степан изэрд выlö квайт час рыт кежлө. Шондiа да шоньд рыт öтувтiс ставнысö, ышöдiс гажöдчыны и версьтöс, и поснысö.

Семья - быд мортлөн олöмын медшöрыс, сюрöсыс. Морт оз вермы овны матысса да радейтысь йöзтöг, та понда и тайö гажыслөн выныс ыджыд.

Дзöлюкъяс котöртисны сiдз шусяна «ползункиа забегын», а ныв-зон ордйисны самокатөн да велосипедөн. Республикаса социальнöя сöвман агентство вермысьяслы сеталiс козинъяс.

Гаж вылын позис казавны вижовгöрд футболкаа томуловс. Найö

зильöны «От сердца к сердцу» волонтьрьяслөн öтмунöмын. Найö и котыртлiсны аквагрим да катшасин вöчан мастер-классъяс. Катшасин - гажыслөн медшөр символ. Сийöс дасьтан мастер-классö пырöдчисны эз сöмын челядь, но и налөн бать-мам, быдса öчеред весиг артмывлiс.

Площадь вылын дасьтылiсны сцена, кытөн петкöдчисны творчества котырьяс. Сцена вывьянь чолöмалiс ставнысö республикаса Юралысьсöс вежысь Та-

мара Николаева. Сийö тöдчöдiс, мый миян республикаын быд ногыс зильöны отсавны семьялы да мамъяслы. Традиция серти тайö лунö чолöмалöны крепыд семьяясöс, кодыяс олöны 25 да унджык во нин. Тамара Николаева висьталiс, мый таво «За любовь и верность» медаль лои сетöма республика пасьта 68 семьялы. Сцена вылын нöшта нимöдiсны Сыктывкарса дас гозьяös, öд найö петкöдлiсны бур пример том семьяяслы.

Гаж дырйи чолöмала-на кывьясөн нöшта петкöдчисны Коми Республикаса социальнöя сöвман агентствöөн веськöдлысь Илья Семяшкин да Комиын Юралысь бердын челядьлысь право дорйысь Нелли Струтинская. Праздникыс помасис йöктан флеш-мобөн.

Гажсö котыртисны Коми Республикаса социальнöя сöвман агентство да социальнöй технологияс сöвмодан регионса шöрин.

*Миян корр.*



**Том гижысьяслөн Гожся университет тыр-бура уджаліс юркарын июль 1-7 лунъясö. Кыдзи и пыр, томулов велöдчисны журналистика да художествоа гижöд лабораториясын. Ныв-зонлы подуе тöдöмлун сетісны нималана гижысьяс да журналистъяс. Республикаса районъясысь öтдор таво бара на волісны велöдчыны Перым-Коми кытшысь том гижысьяс.**

**Ми окотапырысь йöзöдам том гижысьяслысь университетын велöдчöм йылысь сьölöмкылöмъяссö.**

## Сьölöм вылö воис

Медводдза лунö пыри университетö: уна тöдтöм морт, пукала, пола весиг шыасьны код дорö кö да тöдмасьны.

Сэсся миянöс пуксьöдісны пызан сайö öти кытшö да тöдмасим öта-мöднымкöд, и сьölöм вылын лои кокныдджык. Миянлы кык лабораториясь тшöктісны бöрйіны öтарсö. Бöрйи художествоа гижöд лаборатория. Велöдысь юаліс, мыйла ми татчö локтім, и ми висьталім зэв уна кöсйöм. И öд став менам кöсйöмöй збыльмис! Та кындзи на тöдмаси уна нималана йöзкöд: Елена Габовакöд, Андрей Поповкöд, Алексей Поповкöд, Елена Козловакöд, Владимир Тиминкöд, Михаил Елькинкöд, Татьяна Кузнецовакöд, Анжелика Елфимовакöд, Павел Симпелевкöд, кодъяс висьталісны эз сöмын ас йывсьыс, но тшöтш и сёрнитісны миянкöд, велöдісны гижны-мöвпавны. Меным сьölöм вылö воис, мый сёр-

нитісны найö ас йöзкöд моз. Кор найö висьтасисны, кыдзи босьтчöмаöсь гижны, меным пыр ёнджыка и ёнджыка лои окота гижны водзö. Öд налөн синъясын вöлі öзйö сэтшöм ярьюгыд би, кодöс найö колисны и ме пытшкö. Видзöдан на вылö да аддзан: налы зэв нимкодъ, мый эмöсь литература кыпöдысь том йöзыс.

А став тайö аддзысьлöмсö кытүртіс миян радейтана Анжелика Геннадьевна. Меным сійö зэв ёна воис сьölöм вылö. Кор сійö висьталö, сылөн синмас и сьölöмас öзйö, ыпгялö югыд би. Вермис кö - сетіс эськö тайö бисö быдöнлы. Ачыс зэв энергичнöй, быдöнкöд лöсялö, мыйкö кö оз артмы - оз пиняв, а лöсьöдыштас. Меным юрö воис татшöм мöвп: миян том гижысьяс пытшкын кö эм ичöтик би кинь, да сölънитчам кö Анжелика Геннадьевналөн бикöд - артмас ыджыд



бипур, кодöс быдөн аддзас и кодöс некор некод оз кусöд.

Меным нэм кежлö коляс вежөрö тайö сизим луныс, тайö 14-öd Гожся университетыс!

**Олимпиада ИГНАТОВА,  
Помöсгін сикт,  
Кулöмгін район**



## Понді кужны

Гожумся университетö ме локті Перым-Коми кытшысь. И көр ме бöрйи, кытөн велöтчыны, ме муні Иван Пашко (Павел Иванович Симпелев) дынö журналистика лабораторияö. Эта лабораторияö эшö локтисö öкмыс морт Коми Республикась.

Иван Пашко велöтис миянöс, кыдз колö босьтны быд мортлісь интервью. Сія тöдсöтис местнöй журналлэзысь: «Би кинь», «Чушканзі», «Войвыв кодзув» да «Коми му», «Йöлöга» журнал -газета-зэсіс ыджыттжык редакторрезкöt да сідз одзлань. Велöтчис висьталіс миялö, кыдз колö вуджötны мöдік кыввез йылісь рöднöй кыв вылö.

Гожумся университет бöрсянь ме понді кужны не öддьөн, но бура гижны статьяэз да заметкаэз, понді невна тöдны коми кывсö да вуджötны перым кыв вылö. Ме кöсья университетлö, мед бы сія уджаліс эшö уна во, медбы быдъ кодъ челядь, кыдз и ме, велöтчисö гижны кывбуррез, очерккес, статьяэз.

**Максим ЛЕСНИКОВ,  
Перым-Коми кытш,  
Кудымкар районісь Батина деревня**



# Быль эд вөлі гажжа?!

Том гижысьяслон Гожся университет - это ыджытса-ыджыт Парма-сьолөм, енбиа морттэзон тыра сьолөм пондотчана гижысьясла отир пондаись. Пока уджалө университетыс этия, сэтчөдз енбиа морттэз творитоны, развивайтчыны. Кытчөдз уджалө университетыс - самөй пыдын деревняэсис, селоэсис, районнэсис пондасө локны татчө енбиа челядь. Гожся университетын сетоны дзык толчок, медбы тэ лоин ыджыт мортөн. Тэ лоан ыджыт мортөн нельки сэк, кор ачыт пондан зэв ёна көйыны эта

йылысь. Гожся университетын ме вежөрти эта йылысь, мый медглавнөйыс - это желаннө. Лоас желаннө - лоас быдөс.

Ме пондаись вөлі өддьөн ыджыт чествөн төдсасыны коми-зырянскөй гижиссескөт. Ме понда вөлі дивөөн, мый медпростөй отирись лоисө гижиссез. Елена Габова висьталис: «Деревняэсис артмөны медбур гижиссез».

Менам велөтисьөн вөлі Анжелика Геннадьевна Елфимова. Морт, кода дынись сідзи и киссьоны бичиррез шулдөн. Анжелика Геннадьевналөн ловья синнэз.

Сыкодь морттэс менам олан туй-вылын вөлісө нельки кыка - это мамө и менам велөтись роч литератураөн. Ме көсья, медбы быдөнныслөн оланас коркө да и пантасисө сэтшөм морттэс. Анжелика Геннадьевна төдсасыөм бөрсянь ме точно вежөрти, кино ме муна одзлань велөтчыны. Гожся университет помалөм бөрсянь меным зэв ёна лоис окота велөтны коми-зырянскөй кыв.

Гажтөмтчыны понда. Но, ёрттэз, ти нельки вспомнитө, кыз ми орсимө медоддза лунө, кыз ми төдсасимө өта-мөдкөт, кыз шоччисимө дача вылын, кыз фотографиуйтчимө пляж вылын. Быль эд вөлі гажжа?!

Аха, вот и шыннөвтчитө! Муыс өд гөглянкодь. Пантасьяам эшө, да и не өтпырись.

**Анна ВАСЬКИНА,**  
*Перым-Коми кытш, Юсьва районись Архангельскөй посаг*

## Төда, кодөн лоа

Кутшөм өдйө кольө кадыс! Бытгьөкө сөмын на ме локти университетө, и кажитчис на, кутшөм дыр ми кутам тани овны-велөдчыны! Колис өти лун, сы бөрын и мөд, а талун, бергөдчылы да, сөмын кык лун и кольөма велөдчынытө.

Июль 1 лунө ме бөрийи журналистика нырвизь. Ог төд, мыйла, гашкө, лун-мөд майшаси на. Но өни ме немтор йылысь ог жалеит.

Журналистика котырын ме аддзысьли республикаса уна ни-

малана морткөд, уна мый төдмалі, дерт, и гижны велөдчи. А гашкө, ме муні журналистика котырө сы вөсна, мед стөча төдны, мый ог ло журналистнас. Менө өд кыскө велөдны челядьсө либө уджавны телевидениеын.

Ти, Павел Иванович, велөдиньд овны нюмөн. Ме некор на эг аддзыв татшөм бур да шань мортөс.

Гожся университет велөдис менө, медводз-кө, ашшөрлунө. Сы вөсна мый Петруньсянь Сыктыв-

карөдз ме некор на эг волы өткөн. Мөд-кө, университет велөдис ёртасыны, овны уна йөзкөд өтлаын. Коймөд-кө, ме велөдчи босытны интервью, вөчны репортаж. Төдөмысь, тайө меным коркө ковмас. Нельөд-кө, ми ветлім коми культура шөринө, Печать керкаө, музейө. И ме казялі, мый сэни уджалөны бур йөз, кодьяс пыр дасьось тэныд отсавны. Но медся ёна меным кажитчис «Коми гор» телерадиокомпанияө ветлөм. Ме видлі ачимөс «Вести-Коми» передача нуөдысьөн, сеті интервью. Гашкө, олөмыс коркө йитас менө телевидениекөд, ме та вылө ыджыд лача кута.

И медбөрын, ме куті стөча төдны, кодөн ме лоа. Чайта, тайө медся төдчанаторйис.

Көсья шуны ыджыд аттьө налы, кодьяс пуктисны ыджыд пай Гожся университет котыртөмө, торйөн нин көсья аттьөавны Павел Иванович Симпелевөс, Анжелика Геннадьевна Елфимоваөс, Зоя Алексеевна Корниловаөс, Надежда Федоровна Пунеговаөс, Александра Петровна Бушуеваөс. Найө зэв бур йөз, кодьяс радейтөны чужан кывсө, пуктөны коми кыв да культура сөвмөдөмө пай.

**Вагим СЕМЯШКИН,**  
*Петрунь сикт, Инта район*





## Выль тӧдӧмлунлӧн вежон

Таво мойвиис волены Гожся университетӧ, и, чайта, менам вежӧрӧ сійӧ коляс асьыс торъялана пас. Меным удайтчис аддзысьлыны вель уна йӧзкӧд, видзӧдлыны «Коми гор» теле-радиокомпаниялысь студия. Тайӧ абу на ставыс, ӧд быд лун мян вӧлі мыйкӧ выльтор. Дерт, дышӧдчыштім, коркӧ узыштын вӧлі окота, кӧнкӧ сёйыштын, но уджавнысӧ век быть вӧлі. И со велӧдчан лунъяс колисны бӧрӧ, воис нин медбӧръяис. И сӧмын ӧні ме куті гӧгӧрвоны, мый Гожся университет - зэв буртор.

Гожся университет сетіс меным гижан боксянь ыджыд опыт. Тані велӧдчӧмыс отсалас гижны сочинениеяс да, вермас лоны, мый коркӧ и кывбуръяс заводита гижны. Сідзкӧ, ме зэв рад, мый вӧлі тані. Ӧд тайӧ отсалас и удж бӧрйигӧн.

Аттӧ тэныд, Гожся университет! Аттӧ и налы, кодъяс ставсӧ лӧсьӧдісны, медым мянлы вежон чӧж гортянь ылын вӧлі лӧсьыд овны!

Меным долыд, мый уси шуд тані велӧдчыны.

**Мария МИХАЙЛОВА,**

*Висер сикт, Кӧрткерӧс район*

## Гожся университетын шуда вежон

Со и помасьӧ Гожся университетын вежоныс. Тайӧ некымын луннас том гижысьяс да журналистыяс унатор тӧдмалісны, аддзысьлісны гижысьяскӧд, ӧртасисны ӧта-мӧдныскӧд.

Зэв бур налӧн вӧлі медводдза луныс. Асывнас Кулӧмдін районьыс кык Маша сёрмӧдчисны да кор пырисны жырйӧ, кӧні ставӧн нин пукалісны, весиг неуна гӧрдӧдыштисны. Рытланьыс коми культура шӧриньын Ольга да Виктория петкӧдісны важ коми ворсӧдчӧмъяс да йӧктӧмъяс. Вӧлі зэв гажа!

Мӧд лунас вӧлі зэв жар! Университетын велӧдчысьяс ветлісны «Коми горӧ», нуӧдісны экскурсия. А ӧткымынлы - Вадимлы, Алисалы да Машалы - весиг вичмис видлыны асьнысӧ телеведущӧйясӧн. Ті, гашкӧ, шуанныд, кодлы нӧ пӧ оз кажитчы, кор сійӧс став республикаыс аддзылас. Сідзи и эм. Рытнас ставӧн видзӧдім «Вести-Коми» уджтас, кӧні петкӧдісны та йылысь репортаж.

Коймӧд лунас телевидениеын уджалысьяс волісны Гожся университетӧ. Босьтісны челядылысь интервью. Сійӧ жӧ лунас ветлім Национальной музейӧ.

Пекничаӧ велӧдчысьяс Павел Ивановичкӧд пыралісны республикаса газет-журналлӧн редакциясӧ. Найӧ тӧдмасисны Алексей Полутрудовкӧд, Александр



Ульяновкӧд, Елена Плетцеркӧд, Галина Макаровакӧд, Александр Артевакӧд.

Луннас на дінӧ воліс Владимир Васильевич Тимин, коді велӧдлӧма Гожся университетын медводдза велӧдчысьясӧс. Сылӧн неважӧн вӧлӧма чужан лун, тырӧма 77 арӧс нин!

Сійӧ жӧ рытас вӧлі, гашкӧ, медся виччысьтӧмторйыс - челядь ветлісны коми гижысьяслӧн дача вылӧ шойччыштны. Томулов ворсісны-йӧктісны, сёйисны жаритӧм сосиски, гижисны-сералисны - зэв бура колялісны кадсӧ. Сӧмын тай номъяс дӧзмӧдчисны.

Субӧта. Челядь бара на велӧдчисны. А аскинас ветлісны Кебраӧ, медым веськавны да ас синмӧн аддзывны Иван Куратовлӧн чужӧмсянныс 175 во тырӧмлы сійӧм гаж.

Выльунӧ Гожся университет тупкыяс нин. И таыс ставнымлы зэв гажтӧм. Кажитчӧ, сӧмын на локтісны татчӧ, а колӧ нин мунны гортӧ. А мый вӧлі тайӧ лунъясас - коляс налӧн вежӧрӧ выль тӧдӧмлунъясӧн, казытылӧмъясӧн...

**Мария ЮШКОВА,**

*Ыджыд Куж сикт,*

*Кулӧмдін район*







## Ыджыд ноп

Шулöны тай, локтис пö кушöн, а мунис ыджыд нопйөн. Ме сідзи жö...

Гожся университетö локтигөн ме эг на куж прамöя гижны статья, полі сёрнитны нималана йöзкөд. А татчö волём бöрын менö быттьö вежисны. Гожся университетын велöдчигөн ме тöдмасы уна енбиа йöзкөд, кодьяс пуктисны менам водзö сөвмöмлы зумыд подув. Сідзжö миян велöдысьяс козыналісны быдöнлы асланыс сёлöмлысь торсö. Найö лача кутöмөн видзöдöны водзö, ті пö быдмысь интеллигенцияыс. Ог жö öд торкөй налысь көсйöмъяссö. Огöй!

**Виктория НЕФЁДОВА,**  
Кожмудор сикт, Емгін район

## Козьналісны

Миянлы, Гожся университетын велöдчысьяслы, лабораториясөн веськөдлысьяс козыналісны ассьыныс ыджыд да помтöм-дортöм опытнысö. Университетысь виччыси унатор, но менö збыльвысаяс шензöдіс. Ыджыд йöзкөд аддзысьлöмъяс восьтисны водзö туй. Бурджыка кутім тöдны асьнымöс, мый ми вермам вöчны. Уна гижöд лöсьбöдöм бöрын аддзим ассьыным сямöс. Лоим вынаöсьджык быдторйын: и гижöмын, и сёрнитöмын, и асьнымöс восьтöмын.

Татшöм козин босьтöм бöрын гөгөрвоан: со кутшöм сійö - прамöй козиныс.

**Светлана ЁЛКИНА,**  
Мыс сикт, Кулöмгін район



## Öти кыв, а вежöртасыс ыджыд

Журналистика... Дас кык шыпас... Öти кыв... А вежöртасыс сыын дзевсьö ыджыдсьяс-ыджыд!

Бур да збыльысь тырвыйö журналистөн вермас лоны сöмын повтöм, уджач да лöсьыда гижны кужысь морт. А медым пырöдчыны журналистикаö, школасянь нин колö бура велöдчыны да тайö удж йывсыс көть неуна тöдыштны.

Журналистикаö менö кыскö сідз шусяна эстрим, виль йöзкөд тöдмасьöм. Сöмын ме ог на тöд, лоас-ö журналистикаыс менам профессия-өн. Менам чайтöм серти, сійö лоас содтöд уджөн. И кыдзи и шöр уджой, кутас вайны сöмын бур сёлöмкылöмъяс.

**Анастасия КОЛИПОВА,**  
Гагшор сикт, Сыктыв район





## Гөрддзасьысь ДЗОРИДЗ

Колины бөрö Гожся университетын велöдчан лунгяс. Регид помассяс гажа да зэв колана, тöлка кадыс. Бөрö колясны Анжелика Геннадьевнакöд сьölöмтö вөрзёдысь сёрнияс, коми гижысьяскöд вунöддытöм аддзысьлöмгьяс. Колясны бөрö и сэтшöм дона да енбиа выль ёртгьяс, гажа рытпукгьяс, велöдысьяс.

Зэв жаль, мый здук мысти тайö ставыс помасяс, кусас. Пöддасясны Гожся университетлөн паськыд öдзöсьяссыс, но некор оз сипгыссы, оз кув велöданторйыс. Университет сетис позянлун петкöдлыны ачымöс, видзöдлыны йöз вылö. Ме гөгөрвои, мый ме абу на мастер гижны, мый сулала медводдза да медсьökыд тшупöд вылас на, мый ме сöмын на ичöтик-ичöтик, муртса на гөрддзасьысь дзоридз, кодi, кöсьяс кö, вермас мичаа паськавны, дзоридзавны.

Мыйысь кута ме гажтöмтчыны, кор помасяс Гожся университет? Збыльысь, дзик гажтöмтчытöгыс нач он жö ов. Дерт, оз кут тырмыны гижан руыс, ёртасян сынöдыс. Но медся ёна, кыдзи пырджык и овлö, понда майшасьны сыысь, мый эг вермы, повзи, яндыси юавны мыйкö зэв коланатор, мый эг вермы помöдз восьтны ассьым лолöс, мый эг висьтав став кывсö, мөвпсö, кодгьяс олісны мейн.

Меным зэв ёна оз кутны тырмыны Гожся университетын колялöм лунгьясыс.

*Виктория ТУРКИНА,  
Туискерöс сикт, Емгін район*



**Гожся университетын велөдчысьяс нöшта гижыштöмаöсь, кызди найö ветлöмаöсь Сыктыв районса Кебра сиктö пасйыны Иван Куратовлөн чужöмсяньыс 175 во.**

## Иван Куратовлы сиём гаж

Сора 6-öd лунö ветлим Сыктыв районса Кебра сиктö. Вöли зэв гажа: ветлим музейö, гажöдчим, йöктим, лыддим ассыным да Куратовлысь кывбурьяс, сьылим, йöктим. Зэв бура дасьтысьöмаöсь гаж кежлö. Аддзысьлим гижысьяскöд, Коми Республикаса Юралыськöд. Волісны уна районысь гöсьтыяс.

Кажитчис Куратовлы сиём музей, аддзылим сылысь уджалан пызансö, узылан полатьсö, роч пач, потан. Сьölöмö коли Куратовлөн геройсылы сиём музей.

**Полина ПОПОВА**

Куратовоö воим асывнас. Сэни вöли нин сувтöдöма ыджыд сцена, юргисны коми сьыланкывьяс, да и вузасысьяс вöли нин сулалöны быдсяма төварөн.

Кажитчис гаж заводитчöмыс, кор йöктисны и том, и верстьö. Сэся и миян öчеред воис. Миян пöвстысь öткымынөн лыддисны ассыныс кывбурьясö, а бöрын йöктим неыджыд флешмобын.

Пажын бöрын муним музейö, «Кöч Закар керкаö». Сэни петкöдлісны эз сöмын презентация, но и мультфильм. А сійö кадö сцена вылын петкöдчисны став районсьыс воём сьылысь-йöктысь котырьяс.

Миянлы вöли зэв нимкодэ, мый веськалим тайö гаж вылö. Öд сэни öттшöтш вöліны чина йöз - Вячеслав Гайзер да районса юралысьяс.

Чайта, мый и 5 во мысти, кор И.А.Куратовлөн чужöмсяньыс тырö 180 во, ми ставөн бара на волам татчö!

**Мария ЮШКОВА**

Талун ми ветлим И.Куратовлөн чужан сиктö. Гаж вылö волісны уна районысь котырьяс. Дерт, и ми эг бокö кольö. Зэв мичаа сьылісны-йöктисны - ёна дасьтысьöмаöсь гаж кежлö. Гаж дырйи уджаліс ярманга, көни вузалісны чöскыдторьяс. А таöз ветлим Куратов нима музейö.

Гажыс воис сьölöмö, öд тані ме вöли медводдзасысь. Миян команда лыддис кывбурьяс, йöктіс. Некор эг на вöв татшöм гаж вылас. Чолöмала став коми войтырöс тайö пасөн да сиа, медым коми кыв пыр юргас миян муын.

**Вагим СЕМЯШКИН**

Куратовлөн гаж дырйи, кызди и став Гожся университетын олөм, вöли гажа. Локтöмаöсь уна нималана йöз, сьылысь-йöктысь котырьяс. Став

сиктөн гажöдчисны. Татшöм ыджыд мортлы, кызди И.А.Куратов, дерт, татшöм гажтö колö котыртны.

**Светлана ЁЛКИНА**

Быд во Куратов сиктын мунö ыджыд гаж. Ми пыралім музейö, көни овліс Иван Алексеевич да гижис ассыс мича кывбурьясö. Миянлы петкöд-



лісны презентация. Визин сиктысь велöдчысь шуис, мый Куратовлөн чужан муын олгөн и ачыд лоан гижысьөн. И ме тшöтш тадзи мөвпала. Став мичсö Кебра сиктысь ми видзöдлім. Гашкö, уна во мысти ми тшöтш лоам нималана позтьясөн, Куратовлөн нывьясөн да пиянөн.

**Вика НЕФЁДОВА**

Гажыс кыпыда муніс. Меным кажитчис коми позтысь кывбурьяс лыддьöм, музейö ветлөм, Кебраса вөр-ваыс да сійö, мый войтырыс радейтö да пыдди пуктö И.А.Куратовöс. Радейтöны сылысь кывбурьяс, тöдöны наизусть. Бур, мый войтырыс сёрнитö коми кывйөн, чужан кыв вылын.

**Анна ВАСЬКИНА**

Гожся университетын велöдчысьяс ветлим И.А. Куратовлөн чужанінас, Кебра сиктö. Ме тані медводдзасысь вöли, и меным кажитчис сійö мортыс, коді пасьтасьліс И. А. Куратовö. Сэтшöм жö восьса сьölöма, пыдй вежöра, ассыс чужанінсö радейтысь да пыдди пуктысь. Воис сьölöмö и Кебраса вөр-ваыс. Сійö ас дорас кыскö гöсьтыясöс. И кызди шуис öти морт, ми öні абу медводдза позтлөн чужанінас, а коми поэзиялөн гортын. Лоö кө позянлун, нöшта на вола Кебраö.

**Мария ШАХОВА**



# Гождя мойдын

Геннадий ПОПОВ

## Сора тöлысь

Волөн джынйыс коли бөрö,  
Со нин сора тöлысь тан.  
Том и пöрысь зiля вөрö,  
Страдна кад öд, шондiбан.


Дзужа-дзажа косьмö турун,  
Сувтö зорöд - сток да сток...  
Чöскыд бипур вылын пуом  
Ёкыш юква, йöла рок.

Чöd да чödлач кисьмö вöрын,  
Нюрын мырпом уна зэв.  
Ставсö вотам страдна бöрын,  
Пötöса мед лоас төв.

Снимокъясыс

Антонина ВЕТОШКИНАЛÖН.





*Гожомсö Енмöс моз төвбыд виччысян. Дасьтан мича платтьö-сарапан, туша-мыгöртö «лöсьöдан», төвсьяныс нин аддзан, кыдзи тэ, мича да статя, синмö шыбитчысь купальника пукалан ю-саридз дорын, и тэ вылö бергöд-чылöмөн видзöдлö став мича зонмыс... А со тай тавося гожöмыс оз ёна нимкодьöд миянöс. Унджык кадсö, кодъяс*

*карö кольччöны уджавны-велöдчыны, лоö пукавны керкаын. Сиктö мунысьяслөн уджыс юр выв тыр. И налы мöдарö, окота мыйкö асланыс сьёлöм серти босьт-чыны вöчны. А мый эськö позьö вöчны гожöмнас прöст кадö?*

### Карын:

1. Йöктыны.

Та вылö включит радейтана шыладтö, сувт рөмпöштан водзö да быд ногыс вежнясь. Оз бара-й некод шу, мый он куж. А такöд тшöтш и туша-мыгöртö лöсьöдыштан, ветласногтö мичмöдан.

2. Велöдчыны ворсны гитараөн либö мöд ворсан инструментөн.

3. Позьö и анлия кывтö водзö велöдны.

4. Окотитысьлы позьö велöдчыны фокусъяс петкоддыны, медым ёртъясыдкöд аддзысьлигөн вермин найöс шензьöдны.

5. Матыссаыдкöд либö карö кольччысь ёртъясыдкöд позьö ветлыны и походö да лöсьыда колявны сэнн прöст кад.

6. Öткымынөн ёна кöсийны велöдчыны ролик-велосипедөн катйтчыны. Та вылö гожöмыд - медбур кад.

# Шуда здукъяс

### Сиктын:

1. Дерт, сиктö кö муно карса том морт, сылы сьöкыдджык лöсьöдны прöст кадсö. Но и танн позьö зэв бура колявны каникултö. Медводз - аддзыны выль ёртъясöс, да найö унаторйö велöдасны-чуйдöдасны тэнö.

2. Пöттöдзыд купайтчыны-уявны. Öд сикт-грездъясид пырджык меститчылöмаöсь ты-юяс бокын, а сидзкö, купайтчан местаыд танн быттьысь эм.

3. Чери кыйны радейтысьяслы сиктад вöляыд эм жö. Весиг налы, кодъяс некор на киас эз кутлыны вугыр шатин, поэяс видыны кыйны черитö.

4. Поэяс вöзйыны и тшöкыд-джыка ветлыны вöрö, медым чукöртны вотöс-тшак.

5. Лыддьысьны бвла вылын, ловавны сöстөм сынöднас, фотографируйтчыны.

6. Кодн карсянь воö пöль-пöч дорас, позьö велöдчыны чöскыда пусыны-пöжасьны да вöчны варенньö.

7. Сиктад пывсянтöгыд некод оз ов. Та вöсна позьö выль корöсьөн сьёлöмтö бурмöдтöдз швачöдчыны, пывсьыны-мыссьыны, а сэсса варенньöа чай юны бвла вылын. Со кöнн радыс да гажыс!



*Бура шойччöй, медым выль велöдчан во вылö тырмис вынныд!*





**Нывъяслы  
ЛИСТБУК**

*Гашкө, воис жö сэсся гожöмьд, а ськөд тшöтш отпус-  
калан кад. Мөдöдчан саридз дорö, а кадьс дзик нин абу  
сумка чукöртöм вылö? Вöзъям медшöрсö, мый ковмас  
тэныд пляж вылын.*

# Мөдöдчачал саридз дорö

Медводз сумкаад колö суйны купаль-  
ник. Оня мода вöзйö пöдса купальник,  
но верман и бикини бöрйыны. Кутшöм  
рöма бурджык? Зарни, эзысь, синмö  
шыбитчана мукöд рöм. Мича видзöдны  
саридз рöм вылö - торйөн нин лöсялö  
купайтчигөн да гожйöдчигөн. Мед-  
шöрыс - бöрйы купальниктö тэныд  
лöсяланаöс, а сэсся нин мода вылö  
видзöд.

Босът некымын купальник - он  
откодöн ло быд лун. Мöд-кö, гожъ-  
ялгөн купальник туйыс оз кут тыдав-  
ны. А коймöд, мыйыс оз овлы - вермас  
отиыс вошны либö киссьыны.



Эн вунöд юр вылö пасъ-  
талантор йылысь, медым  
лöсялис купальник дорад.  
Чышгьян, бандана, бейсбол-  
ка - спортивной сикаса ку-  
пальниклы лöсялö. Пасъ-  
кыд шляпа - ретро стиль-  
лы. Панама лöсялö став  
дорас.

Аксессуар пыдди босът  
парео, туника. Налы уна  
места оз ков. Пареоысь  
позьö вöчны юбка, топ, са-  
рафан, юр вылö пасъта-  
лантор да весиг рытъя  
платтьö. Да и шондйысь  
позьö дзедьсыны пляж  
вылын.



Ковмас каблук-  
тöм көм, мед эз  
вöv сьöкыд ветлы-  
ны. Кут тöд вылын  
- ва кокыд да лыа  
ёна мисьтöммöдö  
көмтö.



Пляж вылö  
быть босът оч-  
ки - мичаа ви-  
дзöдсьö и ви-  
дзö шондйысь.

Блын кө пляжыс,  
пасъгав туника, са-  
рапан, футболка, топ,  
юбка. Шорты лёк  
сйён, мый вермас  
кötасьны ва купаль-  
никысь.



Пляж вы-  
лö ветлан сум-  
ка, медым оз  
кötась.

Колö-ö пляж вылын басит-  
чантор? Мода журналын тшö-  
кыда аддзан сикötшөн мичмöд-  
чöм саридз дорын гожйöдчысь  
нылöс. Но збыльвылас гырысь  
сикötшыд кутас мешайтчыны  
гожйöдчыны, мисьтöммас са-  
ридзса ваын, а чунькытш кок-  
ниа вермас петны чуньсьыд ку-  
пайтчигад. Бурджык коль найöс  
рытпук кезлö. Пляж вылын ков-  
мас юрси кутан.




## ТӨД ВЫЛӨ

**Коми Республикаын Россияса МЧС-лөн медшөр управлениеысь уджалысьяс вöзйöны челядьлы индöдьяс, кыдзи колана ногөн коллявны гожöм. Мед эськö некутшöм неминуча оз су ныв-зонмöс ни гортын, ни ывлаын.**

# Майшасьтöм гожöм

## Ва вылын

Шондöдыштöм бöрын томуловлы öдйöджык окота котöртны вадорö купайтчыны. Видзöдöм-пырысь, тавося поводдьяыс оз на сет купайтчыны окотитысьяслы вöлясö. Ты-юясын ваис кöдзыд на, да та вöсна вермас босытны войтöв. И сэки нин моргыс оз вермы легöдыштны кисö ни коксö, сідзкö, и мыйкö вöчны. Татшöмыслы колö отсöг. А кыдзи верстытöг пуктасны асьнысö ныв-зон? Та йылысь колö висытавны да туйдны бать-мамлы.



## Öзйылöмьяс дырйи

Уна öзйылöм республикаын овлывлö челядьлөн дурöм вöсна. Быдөн тöдö, мый оз позь керка-стройбаяс дорö матö вöчны бипур. Вöрö мунысьяслы торйөн нин стрöга висытавны-öлöдны, мый бипурьяс öзтыны оз позь.

Казялинныд кö кыськö öзйöм, пырысьтöм-пыржö юөртöй «01» да сотöвöйсянь «112» номерьясті колана службаяслы, стöча висыталöй местасö да накöд йитчыны позяна юөр, а сэсся котөрөн мунöй öзйöм местасысь.

## Туй вылын

Быть колö тöдны туй вывті ветлан правилöяс. Верстыöджык томулов, велöдöй ичöt чой-воктö колана ногөн вуджны туй.



А нöшта томуловлы колö бура велöдны колана службаяслысь телефон номерьяс:

**01** - неминучаысь мездан служба, **02** - полиция, **03** - тэрыб отсöг сетан служба да **04** - газöвöй служба.

## Бать-мамлы тöд вылö:

★ истöг-зажигалка да быдсикас бурдöдчанторсö колö видзны челядь синмысь бокын;

★ оз ков тшöктыны посни челядьлы аслыныс ломтыны пач, вöдитчыны газо-электроприборьясөн, гортса уджьяс вöчигөн оз ков вунöдчыны ичöтгьяс йылысь. На бöрся öд колö уна син, медым казьявны розеткаö чунь суйöмсö либö газö кутчысьöмсö;

★ быдтасныдлы висыталöй, медым эз сёрнитны да эз мунны бокö тöдтöм йöзкöд. Таысь кындзи казытыштöй, мый оз позь ворсны машина-поезд ветлан туйяс дорын, вөрöдны кöзяинтöм пемöсьясöс.

«Коми йöзöдчан керка»  
Коми Республикаса  
автономнöй учреждение.

Веськöдлысьяс  
удж вöчысь  
**Е.В.ПЛЕТЦЕР**  
Гл.редактор  
**Г.В.МАКАРОВА**

Газет панысь:  
Печать да юөр сетан Коми  
Республикаса агентство.  
Регистриуйтöма  
2007 вося ноябрь 28 лунö  
йöзлы юөр сетöм да  
культураса озырлун видзöм  
кузя оланпасьяс  
збыльмöдöм бöрся  
видзöдысь федеральнöй  
службалөн Беломорскöй  
управлениеын.  
Регистриуйтан пас:  
ПИ №ФС 3-0686.  
Социальнöй тöдчанлуна  
гижöдьяссь йöзöдöма «Коми  
йöзöдчан керка» автономнöй  
учреждениеыль печать да юөр  
сетан КР-са агентствöөн  
вичмöдöм сьöм вылö.

Редакциялөн адрес:  
167982, Сыктывкар,  
К.Маркс улича,  
229-öд керка,  
401-402 кабинетьяс.  
Тел. 24-12-22, 24-36-49.  
E-mail: Yologa@mail.ru

Редакцияын  
уджалысьяс:  
том йöзлөн мытшöдьяс  
юкөнөн веськöдлысь –  
Надежда Пунегова;  
письмö юкөнөн  
веськöдлысь –  
Екатерина Микушева.

Медводдза лист бокас  
снимокыс  
Екатерина  
Микушевалөн.

Авторьяслөн мөвпьяс оз  
пыр лöсявны редакциялөн  
видзöдласкöд.

Тираж – 421  
Гижöдчан индекс – 52099.  
«Йöлöга» газет петö  
1991-öд восянь  
вежоннас öтчид, комиөн.

Печатьö кырымалан кад:  
график серти – июль  
тöлысьлөн 9-öд лунö  
16 часын; кырымалöма  
печатьö 16 часын.  
Газет печатайтöма  
«Коми республиканскöй  
типография» ООÖ-ын дась  
оригинал-макетьясысь.  
167610, Сыктывкар,  
В.Савин улича, 81  
Заказ №

**Видзöй асьнытö да матыссаястö! Лоöй дзоньвидзаöсь!**

КР-ын Россияса МЧС-лөн медшөр управлениелөн юөр серти

## ШӨПКӨДЧЫШТАМ

Этикет правилө ёна мичмөддө мортос и, мөдарө, - няйтө уськөддө, он кө сійөс төд. Озыр көтө гөль, колө кужны кутны асьтө йөзаинын. Вайөдам некымын индөд, мый медъёна паськалөма миян пөвстын.

# «Тэ» али «Ті»?

- Зэр улын көтасьом зонтик оз ков косьтыны восьсаён - көтө удж вылын, көтө гөсьгьясын. Колө пуктыны торъя подставка вылө либө өшөдны.



- Целлофан пакетөн позьө вөдитчыны сөмын лавкаысь локтигөн. Сы бөрын сумка туйө новлыны сійөс абу мича.

- Сумкатө оз ков путины пидзөс либө аслад улөс вылө. Ичөтик клатч позьө пуктыны пызан вылө, а ыджыдджык сумкатө өшөдны улөс мыш вылө (ресторангьясын та вылө сетөны торъя улөс).

- Нывлы позьө не пөрчыны керкаө пыригөн шляпа да перчатки, но оз шапка да кепысь.

- Ас вылө өшлөм баситчаторйыд мед эз вөв унджык 13-ысь (татчө тшөтш пырөны ювелирнөй кизьяс). Перчатки вылө оз пасьтавын чунькытш, но позьө пысавны браслет. Кымын пемыдджык бывлаын, сымын донаджык баситчанторгьяс. Ёна водзын бриллиант пасьтавлісны сөмын рытпук дырйи да верөс сайө петөмаяс. Но өні бриллиант новлөны и луннас да томиник нывъяс.



- Корин кө кодөскө ресторано, сідзкө, тэ и мынтысян. Шуам, ныв корис удж кузя зонмөс, сідзкө, ань и мынтысьө кафе-ресторанын. Сөмын кор зон ачыс корө мынтысьны, нывлы позьө сөгласитчыны. Но шуан кө: «Гашкө, ветлам ресторано?» - быдөн мынтысьө ас пондаыс.

- Зон медводзөн пырө лифтө, но петө медводз өдзөс дорө матынджыкыс.

- Машинаын медся бур местаыс шопер сайын - сэтчө колө пуксьыны нывлы, а зонмыс пуксьө сы дорө. Машинаысь петигөн зонлы колө быть отсавны петны нывлы. Зонмыс кө ачыс руль сайын, нывлы тшөтш бурджык пуксьыны сы бөрө.

- Висьтавын быдөнлы, мый пукалан диета вылын - абу лөсьыд. Торйөн нин гөсьтө локтигөн. Бур көзяйкалысь быть колө ошкыны чөскыд сөян-юансө, но та дырйи позьө нинөм и не сөйны.



- Сідз шусяна светскөй сёрни дырйи абу мича казгытвын политика, эскөм, дзоньвидзалун, сьом йылысь. Нөшта оз ков шуны: «Кутшөм мича тэнад платгөйд! Дона-ө?» А мый шуны, тэнсьыд кө тадзи юалөны? Вочавидз: «Тайө козин» либө «абу окота та йылысь сёрнитны», сэсса вуджны мөд тема вылө.

- Кодлы эм нин 12 арөс, колө шыөдчыны «ті» отсөгөн. Абу мича, кор нималана да пыдди пуктана йөз «тэасьөны» официантлы да шоперлы. Весиг бур төдсаыдлы официантнөй сёрни дырйи колө шуны «ті», но ас кежысь позьө «тэ» вылө вуджны. Правилөысь петөм - өттшөтшгьяс либө рөдвуж. Мый вөчны, кор тэныд мырдөн шуоны «тэ»? Вочавидзны: «Ті ме дорө шыөдчанныд?» либө «Тянкөд «тэ» вылө эг на вуджөй».

- Абу мича син сайын код йылысь кө сёрнитны. Висьтавын бокиса йөзлы матысса морт, верөскөд олөм йылысь да элясьны чужан странаын олөм вылө.